



REPUBLIKA E SHQIPËRISË
KONTROLLI I LARTË I SHTETIT
ZËDHËNËSI

Tiranë, më 31.12.2012

Njoftim për Shtyp

**KLSH KALLËZON NË PROKURORI
KRYETARIN E KOMUNËS BËRZHITË, QARKU TIRANË
DHE PUNONJËS TË TJERË TË KËSAJ KOMUNE**

Kontrolli i Lartë i Shtetit, në zbatim të programit të auditimit nr. 1160/1, datë 26.10.2012 të ushtruar në Komunën Bërzhitë, të Qarkut Tiranë, ka konstatuar shkelje ligjore në bazë të së cilave është iniciuar kallëzim penal për shpërdorim detyre për Kryetarin aktual të kësaj komune si dhe tre nëpunës të tjerë të saj, me akuzën e shpërdorimit të detyrës dhe shkeljes së barazisë së pjesëmarrësve në tendera dhe ankande publike, të parashikuara nga nenet 248 dhe 258 të Kodit Penal.

Auditimi në këtë komunë evidentoi se procedurat e zhvilluara për dhënien me qira të aseteve në varësi të komunës si dhe shitja e trojeve publike nga ana e saj, është kryer në kundërshtim të hapur me ligjin dhe më konkretisht në 12 kontrata për dhënien me qira të sipërfaqeve pyjore/kullosore për qëllime biznesi (në total 35,85 ha), ku në të gjitha rastet nuk ka patur vendim të Këshillit të Komunës për miratimin e dhënies me qira të këtyre aseteve, ç'ka përbën shkelje flagrante të kërkesave të Ligjit nr. 8652, datë 31.07.2000.

Gjithashtu, auditimi evidentoi që Komuna Bërzhitë, ka vepruar në kundërshtim me kërkesat e Ligjit nr. 9693, datë 19.03.2007 "Për fondin kullosor", i ndryshuar, dhe udhëzimit të Ministrisë së Mjedisit, Pyjeve dhe Administrimit të Ujërave nr. 2, datë 14.05.2009 "Për kriteret e konkurrimit dhe procedurën e dhënies në përdorim me kontratë qiraje të fondit pyjor dhe kullosor", Ligjin nr. 9693, datë 19.03.2007 "Për fondin kullosor", i ndryshuar, në lidhje me sipërfaqet e mësipërme pyjore, nuk ka proceduar me konkurrim për dhënien me qira të ngastrave pyjore dhe nuk është ngritur komision vlerësimi për ofertat e mundshme, përpos kësaj në 4 prej rasteve të mësipërme, kontratat janë lidhur me afat 33 vjeçar.

Nga auditimi i dokumentacionit për procedurat e prokurimit të zhvilluara në këtë komunë, rezultoi se Komisionet e Vlerësimit të Ofertave në disa raste kanë s'kualifikuar në mënyrë të padrejtë dhe kundërshtim me ligjin operatorë të ndryshëm ekonomik të cilët në të vërtetë i plotësonin kriteret kualifikuese dhe

duhej të ishin shpallur fitues në këto procedura tenderimi si ai me objekt “Rikonstruksion i rrugës së fshatit Dobresh, faza e parë”, për të cilin është lidhur kontrata në vitin 2011 në vlerën 11.3 milion lekë dhe është financuar në vlerën 300,000 lekë.

Në total nga raporti i Kontrollit të Lartë të Shtetit, si pasojë e veprimeve të mësipërme penale dhe shkeljeve të tjera të legjislacionit në fuqi është konstatuar një dëm ekonomik në vlerën **17,280,477 lekë**.

Për të gjitha veprimet e mësipërme i janë përcjellë Prokurorisë së Rrethit Tiranë të gjitha provat dhe dokumentet përkatëse, sot në datën 31.12.2012.